

# Kaarata ya Pawulo yoomulebela Titu

## Madhu oovolowana

Murumiwi Pawulo omulebele Titu kaarata ela muwari mwa yaaka ya 64 ofiyedha 67 Kirixtu agabaliwe. Oliye asogolela gerezha dhaatedhene dha eliga ya oKereta. Wale, Pawulo ni Titu yahifiya vamohi wewo, wambeela gerezha dhimohi. Vigavirile mudhidhi vang'ono Pawulo ahimwihya Titu wewule wi asogolele gerezha nda pama. Mwa kaarata ela Pawulo onomulaga Titu mukalelo woolaba mabasa ayo.

Kaarata nndi ninooligana ni makaarata meenddi Pawulo omulebeliye Timoteyo. Makaarata maraaruru ala enowaakamihedha amakambuzi wi enone osogolela pama gerezha dheewa, mwahaya buuyene makaarata ala enoniwe wi “Makaarata a amakambuzi”.

## Ogawanyeya wa kaarata

Madhu oolajela *1.1-4*.

Osakuliwa wa asogoleli *1.5-9*.

Anamavuhulela ooratha *1.10-16*.

Mweeddelo wa aKirixtu *2.1-10*.

Mulugu onowawoobola anamathega *2.11-15*.

Okala mwiilaboni *3.1-11*.

Malojelo oogomihedha *3.12-15*.

## Madhu oolajela

**1** <sup>1-4</sup> Wa we Titu, mwaana aaga-aaga vowi nili a nrromelo nimohive. Di miyo Pawulo, mwiimeleli a Mulugu, murumiwi a Yesu Kirixtu. Girumiwe wi gunnuwihe nrromelo na ale esakuliwe ni Mulugu, gaa-suuzihege ebaribari wi aliwa yeeddege mwa mukalelo onafuna Mulugu. Ndo aliwa eneere, ojejihedha moohaanganyedha wi aliwa eneerege okalawoove. Malabo ehinakalewo Mulugu ahiroromeliha wi athu aaye yeerege okalawoove, Mulugu kanaratha, naari. Mudhidhi wasakuliye,

ahooneyiha madhu aaye odheela mwa dhoolaleya dhaaga. Ala bi mabasa gisakuleliwiimi moolamuleliwa ni Mulugu, Mvulumusi eehu.

Titu, Mulugu Baba ni Yesu Kirixtu Mvulumusi eehu yuuvaha mahala ni murenddele mmurimani mwaawo.

### Osakuliwa wa asogoleli

<sup>5</sup>Guhuuhiya eliga ya oKereta wi osasanyedhe mwapama dhili dhooha-leela teto waasakule asogoleli a gerezha dha maluwa maatene wona muuxagiheliimi. <sup>6</sup>Musogoleli akale muthu oohukanna yoosumululiwana. Akale mulobwana a mwihiyana mmohi, anaaye ekale aKirixtu, ehikale owiinkedhiwa ni meeddelo abure, naari oohiiwelela. <sup>7</sup>Vowi soofuneya wi musogoleli winna omwiinya wa mabasa a Mulugu, ahikalegena yoosumululiwana. Ahikalege owiithukulela, ahikalege owaaguva otakaleliwa, ahikale namang'wa, ahikale namaddwadha, ahikale oofuna oreela moohufwanelela. <sup>8</sup>Mbwenye musogoleli akale muthu oowawaakela aleddo, oodhiveliwa opama, oowaraala, owogoowa, oomudidela Mulugu, owiihiha. <sup>9</sup>Teto oliye akale oohiddeela madhu oororomeleya mooligana musuuziheliwiwiwa wi aandege waalibiha akwaaye ni masuuziho a ebaribari teto wi aavaanyege ale enapokiha mutheenga.

### Anamavuhulela ooratha

<sup>10</sup>Vowi ehikalawo ajinji enapokiha, enawoga dhoohufwanelela, enaanyengetha akwiwa, tthabwa-tthabwa ayene enarumeedha ofuneya wa dhowiNELIWA. <sup>11</sup>Enofuneya wi aliwa ekale oomaalihiwa, wovi enononga emudhi yaatene, esuuzihaga dhego dhoohufwanelela, yiiragana ndo eharagamo korowa. <sup>12</sup>Namavuhulela eewa-eewa mmohi ahiiraga: “AKereta munoratesa, muli apoddogoma owoopiha, muli anrima ooyimwa”. <sup>13</sup>Onamoona ola bwa ebaribari. Mowindo waasumululege mohaahiyedhedha wi ekale ooliba munroromeloni, <sup>14</sup>ehivuruwanege dhilemeelelo dha aZhudewu, ehivuruwanege malamulo a alobwana enaholowa ehiyaga ebaribari. <sup>15</sup>Wa athu apama, dhaatedhene sapama. Mbwenye wa athu abure, ehinaroromela, kavili yapama. Owodha weewa woodidela yapama ni yabure ohubwanyuliwa. <sup>16</sup>Ala enowoga wi ehimunona Mulugu mbwenye enomukoodda ni meerele eewa. Aliwa boweeddiha murima, oohiiwelela, kinna owodha wowiirana mabasa apama.

### Mweeddelo wa aKirixtu

**2** <sup>1</sup>We Titu, osuuzihege nde dhineewanana ni masuuziho ookami-hedha. <sup>2</sup>Alobwana anakalaba ekale owiihihiha, ekale oriiheya, oowaraala, ooliba munroromeloni, moodhivelani teto a ntidi. <sup>3</sup>Mooliganiha, ayebele yeeddege mwa mukalelo woomurihiha Mulugu, ehikalege

adhuvudhuvu, ehikalege adhaari a dhoong'wa. Esuuzihege dhili dhapama, <sup>4</sup>yaawaraalihege anamwali waadhivela amamuniwa ni aniwa, <sup>5</sup>yaasuuzihaga wi ekale oowaraala, oowoma mirima, ookameela pama mmavade mweewa, ekale owawiiwelela amamuniwa wi ahikalevo onaanymulege mutheenga wa Mulugu. <sup>6</sup>Mooliganiha, waalibihege azombwe wi ekalege oowaraala. <sup>7</sup>Mwa dhaatedhene weeneene wawoonihege meeddelo apama owiirana meerelo apama. Wasuuzihaga kurathege, okale oofwanelela oriihiwa. <sup>8</sup>Teto wooneyihege madhu ookamihedha, oohusumululiwana wi ale enapokihana ni we ekalena manyazo mwaha woohukanna yego yoonisumelana. <sup>9</sup>Adhaari yawiwelelege anabwiya eewa-eewa. Esayelege waadhiveliha, ehikanganegena, <sup>10</sup>ehawiiyelege. Moohiyaniha, yooneyihege ororomeleya waatewene mmabasani mweewa wi mwa dhaatedhene dhiwomihege masuuziho a Mvulumusi eehu.

### Mulugu onowawoobola anamathega

<sup>11</sup>Mahala a Mulugu ehikumelela, ehidhana ovulumusa wa athu aatene. <sup>12</sup>Mahala ala enanisuuuziha okoodda dhego dhaatedhene Mulugu dhihinafuniye teto wi nikooddege dhifunelo dhabure dha elabo ela. Mahala ala enanisuuuziha wi needdege mwa mudhidhi ola moowaraala, mowogoowa, mwa ofuna wa Mulugu, <sup>13</sup>needdege mowindo njejihaga moohaanganyedha ofiya wa nthithimiho na Mulugu eehu mulubale, oli Mvulumusi eehu Yesu Kirixtu. <sup>14</sup>Oliye ohiipeleka wa opama weehu wi anoobole mwa dhootakala dheehu dhaatedhene teto wi eelihe mulogo okale waaye-waaye, mulogo wowiipeleka wiirana meerelo apama.

<sup>15</sup>We Titu, osuuzihege dhego dhedhi, waawaraalihaga, waasumululaga ni owodha waatewene, ohumwihiyaga muthu wi oonyemule.

### Okala mwiilaboni

**3** <sup>1</sup>Wawuubusedhege aKirixtu wi yaariihege anamalamula ni asogoleli a elabo. Kalani owawiiwelela, mukalegeve owiisasanyedheene wiirana dhaatedhene dhili dhapama. <sup>2</sup>Wawaaddelege aKirixtu ehimwaa-bege muthu, ehiwanihege, ekale oodhivela, yooneyihegeve opwaasa wa athu aatene. <sup>3</sup>Wale hiyo naali ataduwa ni oohiiwelela, needda moonyengethiwa, naali wona adhaari a dhidhivi-dhivi ni dhifunelo dhoo-hiyana-hiyana. Needda muubureni, a nrima, naali oweeddiha murima, nigananaga mmohi ni mukwaaye. <sup>4</sup>Mbwenye Mulugu, Mvulumusi eehu, ohooneyiha opama ni odhivela waaye wa athu aatene, <sup>5</sup>ohunivulumusa, ehili mwaha wa dhowiira dheehu dhowogoowa, mbwenye mooligana ni thagaraga dhaaye. Ohunivulumusa odheela moohuwiwa ni obaliwa dila biili, onivirusedha odheela mwa Muneba Woweela <sup>6</sup>onikuthuleliye mootthabwa odheela mwa Yesu Kirixtu, Mvulumusi eehu. <sup>7</sup>Mulugu ohiirana nda wi nikale oorumeedhihiwa odheela mwa mahala aaye,

niwelelaga okala amudhi a Mulugu nijehedhaga moohaanganyedha egumi yohumala.

<sup>8</sup>Madhu ala booromeleya, vano ginafuna wi we Titu, waawaddihedhege moriihedha dhego dhedhi wi ale enamuroromela Mulugu yiipelekegeve mowiirana meerele apama. Dhego nda sapama dhoopuriha. <sup>9</sup>Orabelege dhoovaanyihana dhootaduwa, dhoovaanyihana dha makolo, dhookangana ni opambihana mwaha wa Malamulo, vovi dhego dhedhi seebeweene, kadhinna mpurelo. <sup>10</sup>Akalavo muthu mmohi onatatamula ogawanyeya mugerezha, omusumululege dila yowambeela ni dila ya nabiili, baahi. Oliye ahaandeyaga, omurabele. <sup>11</sup>We ohumunona wi muthu oyo ohuholowa, dhoothega dhaaye dhinowooniha wi oliye ohuvirigana.

### **Malojelo oogomihedha**

<sup>12</sup>Goorumihedha Aritemasi naari Tikiku odhe mowaaguva wa miyo oNikopolisi, vovi gisakule givireliwe mudhidhi wooddiddila wewo.

<sup>13</sup>Zenasi, namatapulela a Malamulo ni Apolo, waakamihedhege ni murima waatene wi ehikalena yowaahaleela voolenddoni weewa. <sup>14</sup>Wasuuzihe aKirixtu eehu yiipelekegeve mwa meerele apama wi ekalege owiisasanyedheene ookamihedha mudhidhi wohaleeliwa mowaaguveya wi dhigumi dheewa dhikalena mpurelo.

<sup>15</sup>Aatene eli ni miyo enowuulojela. Waalojele ale enanidhivela mwa nrromelo.

Mahala ekale ni nyo mwaatene.